

江西詩徵

江西詩徵卷三十八

南城曾煥賓谷編聯

元

周伯琦

伯琦字伯溫饒州人應極予以蔭授南海縣主簿  
擢宣文授經郎歷官至兵部尙書叅知政事招諭  
張士誠客禮甚隆因留平江十餘年士誠亡尋歸  
鄱陽卒有近光扈從集

賦得灤河送蘇伯修參政赴任湖廣

清灤悠悠北斗北千折縈環護邦國面疑銀漢天上來搖  
漾蓬萊雲五色蛟龍變化深莫測金蓮滿川淨如拭鑿與

言  
卷三  
歲歲兩度臨  
雨露同流草蕃殖  
長亭短亭來往人  
朝夕照影何嘗息  
相君親授臨軒勅  
紫駟嚼齧黃金勒  
却從江漢望龍岡  
三疊晴咀勞夢憶

入居庸關

出關復入關  
五見月上弦  
草木雖未霜  
寒風已淒然  
佳路何紆縈  
疊嶂橫中天  
上有太古石  
下有無底泉  
幽致良足嘉  
萬雷奈喧闐  
馴象寶轡鳴  
紫駟錦幪鮮  
鐵騎簇雲隊  
黃屋循星躔  
時巡謐風俗  
執法恭後先  
達官國同休  
拔宅如登仙  
細民終歲勞  
輪轉百苦煎  
苦樂殊雲泥  
使我中心惓  
惓偶經巖谷勝  
復憶江湖壩  
升高望白雲  
楚天浩無邊  
王師未休息  
敢賦歸來篇

題南陽諸葛廟

劍光流水綠沄沄五丈原頭日又曛  
舊業未能歸後主大星先已落前軍  
南陽祠廟荒秋草西蜀關山隔暮雲  
正統不慚傳萬古莫將成敗論三分

上京雜詩

省方繩祖武清暑順天時  
法從嚴番直周廬肅羽儀  
翟瑜駝背展匱匣馬頭垂  
惟有都人士長望雨露私

卑溼如吳楚雄嚴軼漢唐  
土牀常伏火板屋頗通涼  
茵出沙中美椒生地上香  
忘歸江海客直欲比家鄉

詐馬行 并序

國家之制乘輿北幸上京歲以六月吉日命宿衛

大臣及近侍服所賜只孫珠翠金寶衣冠腰帶盛飾名馬清晨自城外各持綵仗列隊馳入禁中於是上盛服御殿臨觀乃大張宴爲樂惟宗王戚里宿衛大臣前列行酒餘各以所職叙坐合飲諸坊奏大樂陳百戲如是者凡三日而罷其佩服日一易大官用羊二千馱馬三匹宅費稱是名之曰只孫宴只孫華言一色衣也俗呼曰詐馬筵至元六年歲庚辰忝職翰林扈從至上京六月廿一日與國子助教羅君叔亨得縱觀焉因賦詐馬行以記所見

華鞍鏤玉連錢馳彩輦簇轡朱英重鉤膺障顙繫鏡叢星

鈴絲校聲瓏瓏高冠豔服皆王公良辰盛會如雲從明珠  
絡翠光龍蔥文繒縷金紆晴虹犀毗萬寶腰鞵紅揚鑣迅  
策無留蹤一躍千里真游龍渥洼奇種皆避鋒藹如飛仙  
巢崆峒垂鸞跨鳳來曾空是時閭闔含薰風上京六月如  
初冬金支滴露冰華濃水晶殿閣搖瀛蓬扶桑海色朝瞳  
矐天子方御龍光宮袞衣玉璫回重瞳臨軒接下天威崇  
大宴三日酣羣棕萬羊臠炙萬甕醲九州水陸千官供曼  
延角觝呈巧雄紫衣妙舞腰細蜂鈞天合奏春融融獅獅  
虎嘯跳豹熊山呼鼉扑萬姓同曲闌紅藥翻簾櫳柳枝飛  
蕩搖蒼松錦花瑤草煙茸茸龍岡拱揖灤水深當年定鼎  
成周隆宗藩磐石指顧中興王彝典歲一逢發揚祖德并

宗功康衢擊壤登時雍豈獨耀武彰聲容願今聖壽齊華  
嵩四門大啟達四聰臣歌天保君彤弓更圖王會傳無窮  
至正元年復科舉取士制承中書檄以八月十九日  
至上京卽國子監爲試院考試鄉貢進士紀事

上國興王地神州避暑宮規摹三代廓聲教萬方隆至正  
儒科復留司造士充周南麟趾厚冀北馬羣空積雪寒無  
夜清秋月正中氍毹環壁水彩筆扇祥風殿陳寧韜劒先  
登不待弓豹班開曉霧雉羽爛晴虹障候瞻鄒魯都人想  
鎬豐簾分堂上下區列院西東副楮行鴉蠃緘名畫烏蟲  
鴈防周四署塗抹眩雙瞳理到無優劣辭修有拙工神明  
終日鑒造化同時公儼校稽魚豕銓題辨鵠鴻固知散繫

博取以曠爲聰天淨文星麗寒收士氣叢臺萊浮渭洛杞  
梓出恒嵩偕計先章甫前驅軼小戎有人爭覩鳳何處兆  
非熊合志官聯樂連牀笑語同獸爐團炭熾魚燭綴花紅  
雕豆羞肴炙金卮奉醕醕環廬帷毳剡侍史服貂鼯扁鐺  
虔朝莫闕兵慎始終更移壺滴漑衙報鼓籠銅事憶歐蘇  
遠詞懷賈董雄驛程心歷歷雅奏日淪淪聖統乾坤久人  
文日月崇灤河天上出銀漢定相通

九月一日還自上京途中紀事

龍門天下壯只尺異寒暄雲氣東西接泉聲日夜喧柳榆  
環岸塹瓜瓞擁籬樊頗似燕南道農家各有邨

高嶺號槍竿危亭揭嶺顛四山皆培塿萬里盡平川草樹



秋猶秀冰霜石半堅全燕歸眼底佳氣鬱中天

北口七十二居庸第一關峭厓屏列翠急澗玉鳴環佛閣  
騰雲霧人家結市關馬前軍吏候使節幾時還

宜文下直

亭亭翠柏倚朱闌雲母窗扉逼暮寒玉德殿前紅杏樹數  
花猶作去年看

立秋日書事

鐵剎標山影金鋪耀日華龍廻秋嶽雨燕落畫翻沙苑卻  
調驍騎官官葦幰車長楊誰共賦滿耳沸寒笳

夏日閣中入直

金鋪蹲獸鑰銜魚碧樹沈沈白玉除留後命嚴番直肅五

雲漢處掌圖書

冰盤堆果進流霞中秘緡餘夕景斜  
畫舫逕從園殿過鳳麟洲上數荷花

流觴小殿曲闌縈波影簾櫳浸繡楹  
靜畫敲碁中貴語君王避暑在開平

黃河舟中對月

汎舟遡長河河急月色明南風導飛帆  
崖閣波濤平近林鳥雀棲遠岫煙靄生  
茲行道里遙已見草木更初春發燕  
轅首夏還江程祿班敢威遲官守常  
屏營何時歸計遂不爲世塵嬰

紀行詩

居庸東北路草細一川平夾岸山屏展穿沙水帶縈六龍  
扶日御萬騎擁雲旌遊豫諸侯度歡歌兆姓迎

嵐翠摩台斗林霏隱日車谷深幽境迴路轉列峯斜錦石  
欹瑤草蒼叢綴白花柴門成聚落山崦盡人家

萬幕懸崖下高低疎復稠蜀牆聯虎衛幄殿聳龍樓榆柳  
清長畫槐松颯早秋威容隆古昔神武鎮中州

高嶺橫天出炎天氣候涼白沙深沒馬碧草淺連岡晨服  
增縣續寒鄉貨稻梁土風多國語閭井異尋常

涼亭臨白海行內壯黃圖貝闕明清旭丹垣護碧榆龍湫  
時霧雨鷹署世衡虞駐蹕光先軌長楊只一隅

地曠居人少山低雲影微石牆蟲避燥土屋燕交飛沙淨

泉宜酒天涼秋令園朔方戎馬最芻牧萬羣肥  
巡守綏畿甸游從覽近風山川隨地異聲教此時同王業  
艱難遠神都制作雄按行循故事不用避青驄

懷禿腦兒作

漢言後海也

侵晨離白海輦路轉西邁野光散平蕪山容列修黛秋風  
動地來曾波忽澎湃戎馬多驚嘶寒聲襲盤帶踰岡覽時  
川夷曠襟抱快白花閒紫蕤將將委珩珮幽興足目前絕  
境疑方外旌麾匝雲屯輿帳擬行在法從各有司諫垣敢  
荒怠邊報叢遠函蒼黃盡吁怪解鞍惕前郵伏枕念當代  
王綱未旒綴羣生半塵芥紆軫誰與言沉思屢長慨東南  
何時蘇吾欲問大塊

是日驛報杭省有警

興和郡

屬河東寧司按部西抵太原千餘里

我行已旬浹所歷皆朔漠興和號上郡陂陀具城郭灤陽  
界東陵汾晉直西略提封廣以遐編氓半土著連薨結賈  
區曾樓瞰寥廓要會稱雄麗勢壓諸部落興王遠垂裕百  
載承制作北巡必西還遠儼東邑洛供億須浩繁撫循在  
恭恪四鄰慎備虞三輔嚴寄託賢愚不同調蟲沙與猿鶴  
長願四海清漢儀放輝燦

野狐嶺

嶺界南北甚寒南下平地則暖矣

高嶺出雲表白晝生虛寒冰霜四時凜星斗只尺攀其陰  
控朔部其陽接燕關溝谷深叵測梯磴紆百盤坳坵草披  
拂崎嶇石嶮岼輪蹄紛雜還我馬習以安慨然九天上照

熙俯人寰連岡束重隘拱揖猶城垣停鞭履平地回首勢  
望尊縣衣遂頓滅長途汗流羈亭柳蔭古道園果登御筵  
境雖居庸北物色幽薊前始悟一嶺隔氣候殊寒暄小邑  
名宣平相距兩舍閒牛羊歲蕃息土沃農事專野人敬上  
官柴門莫欸延休養嘉承平禹迹適古先漢唐所羈縻今  
則同中原大哉輿地圖垂創何其難張皇我六師金湯永  
溪堅

懷來縣

山風日多寒近燕苦秋陽懷來雖小縣肇置自李唐泉甘  
沙井洌橋古川流長重岡相抱環遠山勢低昂鑿與歲西  
還傾朝迎道傍蟠桃百寶盤敬上萬年觴三登調玉燭羣

卷三十一  
黎樂康莊吾皇仁聖君動必循彝章宵旰貽近憂苗頑尙  
跳梁所賴根本固忍此枝葉傷思見萬邦寧野無遺賢良  
荅復見心長老見寄

浙水東頭佛舍連蒲菴上士坐忘年五雲古衲層瀾湧百  
寶浮圖列宿躔牀上貝書多譯梵門前海舶直通燕比邱  
喜得階蘭秀應種菩提滿法田

九載違離得遠書幾更歲歷斗旋樞華星秋月超元白峻  
嶺重江限越吳柏子樹陰浮碧砌蓮花漏水響銅壺老大  
素存林泉癖一曲何當乞鑑湖

### 梁蘭

蘭字庭秀一字不移泰和人元季兵亂奉母處貧

困力學不廢明初不仕永樂中卒有吐樂集

贈別

門有車馬客長揖別我歸客行歲云暮霜雪沾人衣居人  
送客城南道北風獵獵吹沙草君今一去來何時昨日相  
逢苦不早君當爲我歌我當酌君酒酒酣拔劍起芒光射  
斗斗寶劍乃神物請君慎藏之土花繡澁母足惜風雷變  
化須有時

少年行

白馬羅衣裳照耀東城隅去年出塞歸西却南單于朝立  
白玉墀暮宿青樓姝文臣何足羨奔走如泥塗

遠將歸



遠將歸歸來苦不早黃河西沒不復歸鐵衣夜夜眠秋草  
遠將歸歸來在何時明年二月桃花飛郎時歸來妾小機  
便裁白紵縫春衣

寄劉昭

夕陽初下嶺雲長迴首西風古道傍鴻鴈不來音信杳教  
儂何處覓劉郎教儂何處覓劉郎江水灣灣江路長昨夜  
月明秋似水思君不見斷人腸

送歐陽允堅遼東省兄

遼陽去家八千里阿兄荷戈渡遼水北風吹沙海濤起千  
艘萬艘去如矢阿兄去時衣裳單長夜雨雪衾半寒我欲  
求兄一相見徂徠不愁道路難舍下妻孥自相保春雨山

田種須早假令海水平平可樹桑誓不見兄不來鄉

贈袁彥通

袁郎二十非凡才廣眉清目何奇哉我來山中未相識入  
門一見心眸開把臂登樓酌我酒六博行觴不停手座間  
索客歌黃鍾馬上調弓剪青柳君家舊時不可當與臺出  
入皆輝光乃知公侯始必復如君志氣非尋常男兒困窮  
須自保袁郎毋用傷懷抱君不見東漢吳子顏十年返馬  
漁陽道

送人復往遼東

鎮東將軍度遼水健兒悉發良家子旌旆連屯四十營鉦  
鼓喧闐五千里城門大開高枕眠敵人不敢來窺邊白鹽

堆雪旋煮海綠麥翻雲新種田去時軍田祇有馬只今牛  
半遍原野舊說冰雪苦早寒只今天氣如中夏子從去年  
遼東來令嚴不敢久徘徊錦袍重重厚裝束樓船噉天  
際開臨行莫作刺刺語男兒功名須自取詔書早晚征高  
麗手繫蘇文獻聖主

述懷寄弟

曩者一分散奔走恐弗全鑿坏旣匪愚踰垣諒亦賢豈無  
內顧憂萬事如棄捐樊籠能苟脫尺素焉可傳思親終夜  
起憶弟看雲眠歲月苦易邁肝腸徒自煎窮途賴知己感  
激能相憐天寒製衾裯日暮留杯棬分題刻明燭看劍對  
長筵醉來幸自遣醒後還復然去秋始得書季冬乃言旋

歸途雜雨雪跬步不可前僕夫行且僵衣袂皆已穿依依  
望故里廢城遙相連空壕下歸鷺墟曲生寒烟入門拜慈  
母涕淚流潺湲下堂見童稚驚喜走欲顛大兒頗聰明几  
案錯簡編小兒亦娟好但覓粥與餽孟光事辛苦何暇施  
朱鉛溫言慰飢渴訴言累萬千親戚暨鄰舊來往相摩肩  
謂我非此行微纏乃拘攣有妹獨永訣痛哉問黃泉死者  
長可悲音容日以遷俯視數尺墳新草何芊芊親年迫衰  
暮復以憂恨牽叔也乃不回云泛吳中船吳中幾千里悠  
悠越山川溯我別汝來迄今踰三年豈徒空匱數况復幽  
患纏春令在原上見此棠棣篇我意俟汝歸卜築西城塹  
怡愉共甘旨出入相後先夜讀古聖書朝耕高原田賤貧

貴努力窮達信所天汝歸定何時令我心若懸春雨日瀟瀟飛鴻亦翩翩裁詩寄天末悵鬱罄所宣臨書忽哽咽淚下零長箋

西畦自適

守拙一圃間衡從五畝餘藝麻在高邱雜以果與蔬春至百草生趁晴聊荷鋤筋力豈不勞蕪穢亦已除家人會知我慰以酒滿壺偶坐斟酌之日落西山隅歸來北窗下我心一事無

送方知事饋蓮章貢

持麾出蓮幕給餉趨轅門師征抵山谷漕轉迴窮源灘危曰石齒山東洪濤奔舟楫苦不前簡書日紛紜旣虞軍食

乏復恐民力煩王事亦有終  
僇勉服其勤奚必矢石間而  
後樹功勲策名及振旅足可沾殊恩

### 西翠山房

層軒抗西岑積翠亘千尺  
蘭茗春煙霏松檜秋露滴蒼蒼  
侵緹帷浮浮絢湘帙旭景麗崖紺晴嵐帶林碧仰窺白鳥  
度俯瞰黃猿躑尙書欣重過博士亦屢卽縈途入竹尋危  
磴捫蘿陟投策良少休傾壺聊共適素袍凝黛光錦袂生  
藍色佳境恣逍搖清時幸優逸東山始沾名綠野匪潛跡  
但茲寡塵紛高風孰能匹

### 幽居懷友

幽莊白晝靜居人寡來往高樹落疎陰深泉生逸響抱忡

惜景光微吟答清賞因之懷遠人悵然起遐想

贈樂生歸神樂觀

學仙貴知道豈徒慕長生立身非忠孝仙道奚由成之子  
養性靈殆與元化并不效妄期輩餌藥身始輕舉手謝世  
人持節朝帝京飛霞翼丹輿迴飈凝玉笙顧無凌風翰飄  
飄俱遐征

胡琴

一絃復一絃嘈嘈兩絃間合作千萬聲不勞十指彈凝響  
入冥冥繁音促潺潺秦姬曲纔度趙女語未闌四座初願  
聞聞之俱長嘆

贈蜀中王鎮撫

先皇有天下將軍守關州去家八千里握節三十秋撫士  
能深知籌邊遂良謀子孫日以長功名日以收昨聞朝上  
京復許旋故邱整合姻戚懽靡遑桑梓留劍閣擬玉門詎  
非定遠侯

歸耕

柴車夙言駕迢遙越西區大田旣多稼雨露亦沾濡荼蓼  
日以繁課童孺且鉏家人遺以酒兀坐傾一壺不憚筋力  
勞取樂自有餘歸來北牕下汎覽古聖書但茲安所遇奚  
必南陽廬

京城別僧

迢迢長安街獲與靜者遇纂書靡遑卽話禪罕能慮來去



本無著擬向名山住一往不願來贈言良可慕明發秋風生浮杯渡南去

寄別友人之官古雲中

故人趨薄宦萬里去雲中極塞風霜苦單車道路窮烽烟防笑騎鄉信候飛鴻此別成蓬梗何年語笑同

客舍除夕

此夜數杯酒流年一歲徂客懷空寂寞鄰舍自喧呼寒盡從衣裂更長遇燭孤眼看時序改感激不能無

荆湘道中

江入瀟湘近山連楚塞高兩崖如積鐵一水不容舸慣客寧辭遠藏身豈憚勞同門多宦達漂泊愧吾曹

澗水橫槎度山梯鑿石開昔年經喪亂故壘尙崔巍地迴  
泉聲響天低晚色催迎人將驢裏稍出白雲來

章臺書懷

九阜晴初見雙江雨合流泉聲偏近枕獵火自明樓亦有  
杯中物應無客外愁生涯隨泛梗未擬掉歸舟

擬漢宮

寂寞甘泉路君王不復來旌旗空縹緲蘭麝已塵埃寶鼎  
移朱舫金莖卧綠苔柏梁春夜雨惟有野棠開

龍仙寺

古傳寺鐘與龍鬬田中鐘不勝乃穴地而逃止於  
青原白鷺之間其穴至今尙存徑三尺許泉水湧

出人言其無底焉寺以此得名

古寺名空在依山只數椽鐘逃猶有穴龍去已成仙古礎埋春草廻塘落澗泉諸僧亂離後頭髮也垂肩

贈五將軍傅林蔚

柏臺三尺椽蓮帳署兵曹飛檄文何壯籌邊計最高已能親矢石自可建旌旄振旅陪鵷序南宮賜綺袍

贈馮將軍

選將征南去將軍受脤行玉音宣聖諭銀節下神京仁者今無敵王師古有征豈徒平小醜意在撫遺民夜靜藏刁斗風微捲旆旌明光催獻凱天子自知名

游武山次韻

武姥樓閣山之巔數家茅屋依山前棲岩白雲晴冉冉繞  
林碧篠寒娟娟仙子索詩請題壁樵叟煮茶呼引泉憑高  
騁懷極幽賞使君佳句今人傳

寄呈東原公劉子彥

北闕前年一上書歸來高卧楚郊墟西風短褐雙蓬鬢落  
日空山一草廬道直不殊梁太傅賦成端擬漢相如別來  
又是春三月盡日逢人問起居

客舍述懷寄呈吳公

孤白田郎已出關弊裘季子幾時還古來窮困多奇士今  
日飄零豈厚顏殘燈細雨家家酒落木浮雲處處山客舍  
淒涼秋色晚思君兩地鬢毛斑

客舍秋雨呈東鄰隱君

燈前細雨夜初闌枕上聞雞夢轉難壯節豈因今日改旅懷纔向故人寬江天雨色連窻白草樹風聲入室寒景物已殊歸計遠殘年飽飯共相看

回仙觀

綠樹重重逕滿苔中天樓閣倚崔巍浮翁跨鶴何年去王子燒丹此地來石洞門開秋夕永松壇香繞晚風迴人間自有蓬壺島坐觀昆明幾劫灰

次湯退菴隱居見寄韻

丈人文雅舊知名鄉里衣冠重老成海上青囊傳已久山中白壁種還生臨池洗藥春泉暖入洞看花曉霧晴羽客

將來詩滿紙思君轉似隔蓬瀛

申國公臨江侯濟寧侯金華帳中夜宴次韻

征南白是一長城內府分符總禁兵事業不殊周召虎才  
華仍擬漢匡衡瓊筵看劍春星動玉帳談經夜雨鳴聞說  
蒲桃天上至紫駝銀瓮綠波生

病中得長兒潛書至自北京喜而賦此因便書示潛  
瀟然卧病室南隅賴有諸孫問起居原自閭閻蹤跡少轉  
於朋舊笑談踈餘年止飲瓢應棄近日粗安藥未除底事  
老懷能慰藉扣門人送北京書

書來萬里報平安抱病胸懷取次寬首報邊疆俱人貢中  
期父老倍加餐新分馬乳偏能飲舊賜貂裘不怕寒兼說

冷官多述作賦成早晚寄來看

題扇

鈿合收殘黛香風吹綠衣閑來消永晝非是效班姬

琵琶

金屋漸黃昏香凝錦幄溫未曾辭漢苑哀怨與誰論

迎祥觀

石逕雲深長綠苔仙家樓閣絕纖埃空庭盡日無人到山  
鳥窺簷時下來

題雪竹紅梅

兔園酣宴倚梁王翡翠簾垂錦幄張銀燭燒殘天不曙佳  
人隊隊舞霓裳

題扇

湖水湖山六月清  
畫船曾向越中行  
采蓮一曲歌聲散  
醉看流雲席上生

鄧雅

雅字伯言江西人與梁石門友善洪武中徵聘入

都尋辭還有玉笥集

按四庫書玉笥集提要稱雅爲江西通志失載者茲據以

采入郡縣不復可考

暮歸途中作

殘陽在林梢孤鳥度微影行人念歸程  
十里隔松嶺蕭蕭風色寒漠漠  
烟光暝稍喜近人家溪橋接村徑

晚涼訪隣曲諸友



晚涼步幽徑微風飄衣襟悠悠何所思所思在同心鄰居  
二三友託好在雲林寧憂貧與賤所樂書與琴得閒輒相  
過有酒能共斟醉時各分散明日重相尋

江上有懷石門梁先生

微陽落平沙高樹帶殘雨客思墮微茫漁舟泛容與蕭然  
來遠風獨立誰與語悵望西飛雲相思渺何許

題鎰氏圭峰樓

層樓面圭峰峰色自蒼翠隱几聞松聲開軒納雲氣神清  
餐沆瀣境靜隔氛翳對此彈絲桐中含太古意

送范知縣美解赴京分題得九仙臺

玉山根盤數百里有高臺半空起地闢天開玉削成今

來古往神如止亭亭萬仞撐晴空旭日照耀金芙蓉層崖  
疊嶂鎮晴霧紫蘿碧草搖春風九仙仙去一千載不在緱  
山定瀛海月明環珮每歸來臺上遺蹤宛然在使君閒暇  
寄登臨歷覽遺蹤慨古今指點羣峰三十六石崖飛瀑能  
清心蒼涼落日歸林鶴臺上霞光爛相爍翛然遊罷去朝  
天何日燒丹尋舊約

題丁子堅所藏張彥道畫唐官進馬圖

張君上疏歸來早畫筆猶爲當世寶向來得意寫龍媒雲  
霧晦冥雷電掃青絲絡轡御者誰却憶唐官初進時萬里  
來從沙漠道九衢翻動雪霜蹄當時天子惜良馬亦命韓  
生作圖畫只今閑却兩青驄春草春風在原野

謝子晟惠藤杖

嶺表歸來日枯藤得幾枝情深煩遣贈老去賴扶持正直  
能同撻勻圓頗中規終當乘暇日拄到謝家池

挽何同德

一代衣冠士平生鍊石心有才垂世用多難祇愁吟歲月  
容華老風霜肺病侵不堪埋玉樹痛哭淚沾襟

何彥徽從軍遼東其父往問因寄

令子三年戍嚴君萬里行艱難俱可念相見若爲情遼海  
悲聞鶴天河願洗兵尺書將遠意歸馬看昇平

寄吳孔文

寒風吹野樹白雁起汀沙渺渺長江去曠曠落日斜半生

同作客兩地各思家歲晏吳溪上梅開幾樹花

用韻荅謝彥質

謝家池上又逢春坐見東山氣渾淪千畝竹松宜獨隱一  
簾風月愛清貧鹿門自可攜妻子宣室毋煩論鬼神舊業  
儘隨征戰盡底須愁歎似盧綸

寄錙季恭

何君崑上京如水曾與彈琴坐石床夜久松風吹鬢髮月  
高花露濕衣裳別來每記當時樂老去終非少日狂何日  
重尋舊遊處洞仙頻約醉壺觴

藤杖爲友人賦

老藤絕勝江心竹嶺表分來九節完落手有聲鏗爪甲化

龍無意作波瀾百年歲月堪扶老萬里山川得縱觀亦擬  
穿雲采靈藥相邀拄到九真壇

用何元之韻寄何叔敬兼柬劉子博

渺然離思縈煩襟思君子兮在雲林吹簫石上老蛟舞采  
藥雲中幽鳥吟亭臺有酒秋月白門巷無塵春草深因風  
爲問劉子博學有餘閒時見臨

題吉水王氏山間

六月二日遊山間山人爲我開雲關清風一榻對松竹明  
月九霄聞珮環壺觴日娛賓客集城市不往軒車閒知君  
養鹿樂樵逕許我抱琴常往還

采蓮曲

粉黛粧成宮樣新  
汗凝微澁紫羅巾  
絕憐來往西湖上  
貪看荷華不顧人

綠荷深處水生波  
三五蘭舟載綺羅  
華月漸明風漸息  
吳人愁聽越人歌

重遊何君有感

板橋流水石磯平  
幾度經行酒半醒  
試問隔堤楊柳樹  
爲誰搖落爲誰青

吳城山

西湖水落天風寒  
維舟又上吳城山  
禪林樓閣爛金碧  
洞府神仙鳴珮環  
浩浩乾坤寬眼界  
翩翩鸞鶴下雲間  
登臨正樂催行急  
詔許龍墀趁曉班

江西詩徵

卷三十八

五十四

九

吳城山聽碧山上人講法華經

飄飄空裏落天花靜聽山僧講法華我亦平生無住着白雲深處卽爲家

揭泐

泐字伯防富州人僉斯子工古文善書以蔭補秘書郎歷官福建廉訪使守建寧設方略退陳友諒兵改江西行省未赴以道塞偕子樞浮海趨遼東制授刑部侍郎洪武初召至鳳陽書皇陵碑賜金放還

汪大雅善隸書詩以贈之

漢隸變秦石中郎實云祖渾渾元氣運生意蓄未吐鍾梁

已小變唐遂失其武迨元數公起精妙可追古鳳翥與鸞  
翔爛然照中土老成旣凋謝來者或未覩紛紛欲爭高往  
往背前矩峭刻少渾成癡肥乏筋脅收斂類畏縮軒張或  
奮怒規規事摹仿又若優孟舞汪君忽傑立落筆蔡爲主  
見此神骨全真若古鍾呂美玉出荆璞明珠還合浦況當  
文物新制作方並舉紀常勒鐘鼎封岱禪梁甫大書與特  
書執筆當俟汝具茲華國文名已登天府

秋夜懷芑禪師

商飈起西郊撼撼振林木元鳥辭故壘蟋蟀入牆屋雲間  
出華月照我尊中綠引觴不成醉彈琴不成曲敢恨時物  
遷只歎流景速獨恨清泉師悠然在空谷雞鳴天未曙披



衣候朝旭

張 昱

昱字光弼廬陵人少有俠氣叅楊完者軍遷杭省  
員外郎行樞密院判官後棄官寓居西湖張士誠  
以禮招之知其無用不就明初徵至京甚見溫接  
以老放還自號可閒老人有張光弼集

美人篇

燕趙有美女紅蓮映綠荷珮環雕夜玉團扇畫春羅流盼  
星光動曳裙雲氣多回車南陌上誰不駐鳴珂

五王行春圖

開元天子達四聰羽旄管籥行相從當時從駕驪山者率

相猶是璟與崇華萼樓中雲氣裏兄弟同眠後同起玉環  
一旦入深宮大枕長衾冷如水興慶池頭花樹邊梨園小  
部俱嬋娟楊家姊妹夜遊處銀燭萬條生紫煙寧知樂極  
哀方始羯鼓未終鼙鼓起裊斜西幸雨淋鈴回首長安幾  
十里

白翎雀歌

烏桓城下白翎雀雄鳴雌隨求飲啄有時決起天上飛告  
訴生來羽毛弱西河伶人火倪赤能以絲聲代禽臆象牙  
指撥十三絃宛轉繁音哀且急女真處子舞進觴團衫聲  
帶分兩傍玉纖羅袖柘枝體要與雀聲相韻頤朝彈莫彈  
白翎雀貴人聽之以爲樂變化春光指顧間萬蕊千花動

絃索只今蕭條河水邊宮庭毀盡沙依然傷哉不聞白翎  
雀但見落日生寒煙

題王朋梅界畫大都池館圖樣

國初以來好時節冶綠妖紅蓋阡陌樂遊盡是勲貴家人  
鬧馬嘶聽不得細漆闌干輦子車同載女子如薜花車中  
馬上目相許蝴蝶夢滿東西家牡丹臺畔夜如晝花照銀  
鐙大於斗正月飲到三月中樂地歡天古無有一朝花謝  
春復歸門鎖池園空綠苔簾前塵覆珊瑚樹案上蝶棲鸚  
鵡杯豪華盡逐東流往百年丹青花草莽當時命酒徵歌  
人此日題詩畫圖上

織錦詞

行家織錦成染別牡丹花紅杏花白作雙紫燕對銜春一  
正錦成過半月持來畫堂卷復開佳人細意爲剪裁銀鐙  
連夜照針指平明設宴章華臺爲君著衣舞垂手看得風  
光滿楊柳蝶使蜂媒無定棲萬蕊千花動衣袖回回舞罷  
換新衣新衣未縫錦下機憐新棄舊人所悲百年歡樂無  
片時

蓮塘曲

青蘋風起柳塘水波聲夜聒鴛鴦睡一點芳心不自持露  
荷又作琉璃碎藕絲織錦香滿機裁成衣裳將遺誰只愁  
賤妾夢魂短不恨蕩子歸來遲花間鷓鴣依芳草等閑綠  
遍邯鄲道還應憶念蕩舟人滿架芙蓉鏡中老

過歌風臺

世間快意寧有此亭長還鄉作天子沛宮不樂復何爲諸  
母父兄知舊事酒酣起舞和兒歌眼中盡是漢山河韓彭  
受誅黥布戮且喜壯士今無多縱酒極歡畱十日感慨傷  
懷涕沾臆萬乘旌旗不自尊魂魄猶爲故鄉惜從來樂極  
自生哀泗水東流不再回萬歲千秋誰不念古之帝王安  
在哉薤苔石刻今如許幾度秋風灞陵雨漢家社稷四百  
年荒臺猶是開基處

七夕

乞與人間巧全憑此夜秋如何鍼線月容易下西樓

春光

湖上偏多楊柳風桃花吹盡雨前紅等閑却被東君笑大  
半春光在醉中

題吳綵鸞寫韻圖

小點紅鸞欲下遲遠山渾似畫來眉如何一念人間事上  
界仙曹便得知

惆悵

三山夢斷綵雲空幾把長牋賦惱公畫閣小杯鸚鵡綠玉  
盤纖手荔枝紅春衫汗浥薔薇露夜帳香回茉莉風惆悵  
近來江海上却將鞍馬學從戎

畫船湖上載春行日日花香扇底生蘇小樓前看洗馬水  
仙祠畔坐聞鶯碧桃紅杏渾相識紫燕黃蜂俱有情惆悵

江西詩徵

卷三十八

元十四

三

繇華成逝水盡歸江海作潮聲

惆悵當年使酒來娼樓紅粉夜相催可憐明月三分在不  
見瓊花半朵開誰復醉翁堂下柳更堪從事閣中梅揚州  
一片青青草誰信春來無鴈回

惆悵雄藩海上遊武昌佳氣接神州東風歸思王孫草北  
渚愁生帝子洲楚國江山真可惜劉家豚犬亦何羞不須  
更問中原事官柳新栽過戟樓

至今惆悵在東城結伴看花取次行輦道駐車招飲妓宮  
牆回馬聽流鶯星河織女從離別海水蓬萊見淺清不有  
酒船三萬斛此生懷抱向誰傾

睡覺

滿院楊花風力輕牡丹時節好晴明簾垂不知白日晚睡  
覺忽聞黃鳥鳴萬樹春光金盞酒百年心事玉人箏劉伶  
未到忘形處枉自閑將畚鍤行

別春次揚州成廷珪韻

燕語鶯啼盡可哀更無馬迹到青苔自從玉樹成歌後曾  
見銅仙下淚來爲晉爲秦花幾度行雲行雨日千迴若教  
蝴蝶知春夢儘把黃金付酒杯

湖上漫興

百鎰黃金一笑輕少年買得是狂名尊中酒釀湖波綠席  
上人傳鳳語清蛟蝶畫羅宮樣扇珊瑚小柱教坊箏南朝  
舊俗憐輕薄每到花時別有情



湖上新泥雪漸融  
門前溝水暗相通  
裙欺萱草輕盈綠  
粉學櫻桃淺淡紅  
莫雨欲來銀燭上  
春寒猶在酒尊空  
青綾被薄不成夢  
又是一番花信風

次林叔大都事韻

春來長是誤佳期  
鳩鳥雄鳩不可私  
錯認櫻桃懸鸞子  
悔將衫袖染鴉兒  
燒殘蠟燭渾成淚  
折斷蓮莖却是絲  
辜負綠窗閑歲月  
只教楊柳如腰肢

何處銀鞍白鼻騮  
忘將錦瑟數年華  
渡頭水急憐桃葉  
陌上春狂信柳花  
那得芳心對鸚鵡  
泣將殘淚付琵琶  
一身已自成惆悵  
況是平陽十萬家

莫謾題情在粉牆  
藕絲終日繫柔腸  
不知漢主黃金屋  
何

似盧家白玉堂好夢自拋桃葉後閑愁似過柳條長無端  
收得番羅帕徹夜薔薇露水香

陳王當日賦凌波寫得風流也太多掌上玉鸞看教舞雲  
中青鳥使傳歌情緘尺素魚中字恨織迴文錦上梭休信  
雙星是牛女年年波浪隔天河

贈沈生還江州

鄉心正爾怯高樓况復樓中賦遠遊客裏登臨俱是感人  
間送別不宜秋風前落葉隨車滿日下浮雲共水流知汝  
琵琶亭畔去白頭司馬憶江州

繡毬花次元顏廉使韻

繡毬春晚欲生寒滿樹玲瓏雪未乾落過楊花渾不覺飛

來蝴蝶忽成團釵頭嬾戴應嫌重手裏閑拋却好看天女  
夜涼乘月到羽輪偷駐碧闌干

陪宴相府得芍藥花有感

醉吐車茵愧不才馬前蝴蝶趁花回玉瓶盛露扶春起錦  
帳圍燈照夜開垂白敢思滌洎贈欹紅還是廟廊栽揚州  
何遜空才思惟對高寒詠閣梅

過楊忠愍公軍府留題

總是田家門下客誰於軍府若爲情林花滿樹鶯都散雨  
水平池草自生街上相逢驚故吏馬前迎拜泣殘兵能言  
樓上題詩處猶有將軍舊姓名

丞相委入姑蘇索各官俸米留別幕府諸公

不比常年載酒遊杏花時節出杭州粉闌未覺爲郎貴  
萱草難忘此日憂沙漠帛書空見鴈江湖春水莫容鷗何須  
折盡垂楊柳留取他年繫別愁

至姑蘇呈太尉

相君求米若求雨員外得船如得仙職忝下僚班可恥情  
通隣好亦堪憐山中棋局迷樵客溪上桃花誤釣船醉把  
玉杯無所託不勝惆悵晚春前

解答張太尉見招

中年晚覺壯心去涉世頗知前事非若使范增能少用肯  
教劉表失相依風雲天上渾無定麟鳳人間不受韞  
已隨舟楫遠五湖春水一鷗飛

秋興

一夜涼風便覺秋楚人多感易生愁金盤露水何曾見  
綉扇恩情未肯休零落梧桐宮井上稀疏楊柳御街頭  
近來收得麻姑信說道蓬萊更可憂

侍御周伯溫以行臺羈留姑蘇柬寄之

白頭歲月付流波何物虛名在諫坡屬國莫嫌持節久  
子陽猶謂見天多強梁不見圖銷印跋扈如聞欲倒戈  
一樹紅梨春事晚宣文閣下欲如何

鄰園海棠

自家池館久荒涼却過鄰園看海棠日色未嫣紅錦被  
露華猶濕紫絲囊掌中飛燕還能舞夢裏朝雲自有香  
銀燭

莫辭深夜照幾多佳麗負春光

得編修朱桓海道之音

命酒徵歌記往年玉堂遂有夢相牽魚緘尺素雖云密事  
載空言始可憐季世人材思管樂盛時戎馬說幽燕張騫  
慣識天河路俯仰乾坤一慨然

感事

雨過湖樓作晚寒此心時暫酒邊寬杞人唯恐青天墜精  
衛難期碧海乾鴻雁信從天上過山河影在月中看洛陽  
橋上聞鶻處誰識當時獨倚闌

醉題

二月鶯聲最好聽風光終日在湖亭  
滿宵酒壓楊花夢細

雨燈深孔雀屏情在綢繆歌白芋心同慷慨贈青萍方平  
自得麻姑信從此人間見客星

虎邱寺留題

莓苔欲徧盤陀石知是梁朝古道場陳迹謾驚成俯仰空  
門元不預興亡白漫天上俱兵氣赤伏池中是劍光如會  
生公重說法勸教東海莫栽桑

寄松江楊維禎儒司

畫蛇飲酒合誰先塵土東華四十年海上豈無詩可和雲  
間還有事相牽牡丹開後春無力燕子歸來事可憐欲倩  
鉞龍吹一曲滿湖風浪又廻船

碧簡飲次胡丞韻

小刺攢攢綠滿莖看揅羅袖護輕盈分司御史心先醉多  
病相如渴又生銀浦流雲雖有態銅盤清露寂無聲當年  
欲博千金笑故作風荷帶雨傾

送丁道士還灋陵

丁令還家骨已仙更無城郭有山川未添白髮三千丈又  
見銅駝五百年荒草茫茫連故國孤雲冉冉下寥天灋蘭  
歌送潺湲水望極潯陽思惘然

寄孟昉郎中

孟子論文自老成蚤於國語亦留情省中醉墨題猶在闕  
下新知誰與行紈扇晚涼詩自寫翠鬟情重酒同傾接興  
莫更閑歌鳳只可佯狂了此生



贈寓客還瓜洲

把酒臨風聽棹聲  
河邊官柳綠相迎  
幾潮路到瓜洲渡  
隔岸山連鐵甕城  
月色夜留江叟笛  
花枝春覆市樓簪  
贈行不用歌楊柳  
此日還家足太平

無題

灼灼庭花露未收  
梁間雙燕語綢繆  
新粧滿面貪看鏡  
嬾夢關心懶下樓  
春到自憐人似玉  
困來誰問酒扶頭  
狂蹤已作風絲斷  
敢怨流年似水流

長安鎮市次趙文伯韻

淹遍衣衫酒未乾  
何如李白醉長安  
牡丹庭院溥新露  
燕子簾櫳過薄寒  
春晚絕無情可託  
日長惟有睡相干  
舊題

猶在輕羅扇小字斜行不厭看

謝僧惠蒲履

大夫此日可徒行蒲履深煩遠寄情除是高僧求易得自  
非巧手織難成春來見客身差健老去看花步覺輕他日  
袈裟如過我定須着此出門迎

金山寺

六鰲捧出法王宮樓閣居然積浪中門外鷗眠春水碧堂  
前僧散夕陽紅楊州城郭高低樹瓜步帆檣上下風人世  
幾回江上夢不堪垂老送飛鴻

演法師惠紙帳

銀燈夜照白紛紛四面光搖白縠文隔枕不聞巫峽雨繞

床唯走剡溪雲風和柳絮何因到月與梅花竟莫分塞北  
江南風景別却思羶帳舊從軍

峽川

石與青天近溪雲向客低自然堪下淚不是有猿啼

水殿納涼圖

別殿紅綃女無風亦自涼闌邊是湖水夜夜宿鴛鴦

別劉博士

祇爲情如雨從教醉似泥免看楊柳色相送出城西

過湘湖

湘湖有路接天津萬頃銀花小浪勻安得滿船都是酒船  
中更載浣紗人

柳花詞

欄馬塢西欲暮春花飛不復過中甸倚天樓閣晴光裏  
撲珠簾不避人

滿院長條散綠陰誰家門戶碧沉沉地衣不許重簾隔雪  
白花鋪一寸深

訪舊三竺次泐禪師維興詠

酒館湖船舊有名玉杯時得肆閑情至今人說張員外不  
是看花不出城

鸚鵡士女圖

長門幾日斷羊車閒得工夫坐日斜只有舊時鸚鵡見春  
衫曾似石榴花

寄王梧溪

仙舟曾記過南塘，鳴鳥高梧日正長。  
胡蝶重來春夢覺，牡丹欲盡燕泥忙。  
當時賓客知何往，此日音書或漫忘。  
猶有白頭王粲在，獨將詞賦動江鄉。

春日

一陣東風一陣寒，芭蕉長過石闌干。  
只消幾箇青鵝醉，看得春光到牡丹。

白頭翁

踈蔓短於蓬，昇樓怯晚風。  
祇緣頭白早，無處入芳叢。

饒介

介字介之，臨川人。元末自翰林應奉出，僉江浙廉

訪司事張士誠入吳杜門不出自號華蓋山樵亦  
曰醉翁士誠慕其名自往造請承制以爲淮南行  
省參政吳亡俘至京師伏誅有右丞集

丁未歲論書贈仲溫

太白流西荒音響一何切蒼精散暘谷光彩爛昭晰靈氣  
垂八芒雲漢自茲挾人文旣開張象畫亦區別冥機不自  
見直待智者發誰能懷遂初心焉悟皇韻開門工造車出  
門卽合轍古人有成言得之盡毫髮流形歸自然萬古字  
不滅將同造化功豈獨在臂訣神哉嶽瀆經鍊石補天裂  
與虞山人勝伯陳山人惟寅談及仙游事醉後賦詩

三首兼呈二賢

掃除狡獪蓄神機開頂葫蘆不置扉人物已從垣外見真  
形漸向市中微杯成白鶴冲霄去劍化雙龍破浪歸自此  
更無毫髮累綠毛繞體欲成衣

獨據胡床醉不移坐深簷露滴髭眉蕭蕭風水成音樂澹  
澹星河起鷺鷥語罷欲乘黃鶴去興來忽使白雲馳火龍  
莫傲烹茶叟不析扶桑一氣炊

羃羃松陰布網羅鶴巢松頂吸天河是何道士圍碁坐若  
個樵夫對酒歌看月也知爲爾好凭風無奈欲歸何送君  
直過橋西去還記垂楊葉不多

病中對梅花一株欣然有作錄似西塾孟載季廼塵  
先生一笑

病中雅量豈堪論  
澄水能清撓卽渾  
除却妙香無長物  
祇應靜坐洗煩言  
幾叢晚菊今嘗舊  
一樹寒梅老弟兄  
曾住  
鍾山安石里  
旁人猶恐我爭墩

夜坐

學默三年漫不磨  
流光一去意無徵  
綠如髮白因循染  
道似山青自在凝  
猶有形骸生影迹  
却將文字寄名稱  
一川  
月色多于水  
更著秋霜見底澄

夢中

流水無心競孤雲  
與我同坐深  
明月下行盡  
亂山中花落  
聞啼鳥  
松涼愛御風  
懸知皆夢境  
一笑萬緣空

藜科



堂下生旅藜堂上秋風起藜生何種種秋風落無子子落  
尙復生根枯爲誰死朝乘白露降採割辭螻蟻但知傷藜  
根誰治藜生地我非厭爲羹爲帚爲厥始

送秦文仲博士還三沙

東望大瀛海影落扶桑弓三洲直如矢正射三山中三山  
負曉日曉日波浪紅仙人不騎鶴所適多御風秦君家三  
洲長與仙人通望之不可見忽爾能相面翩翩頭上巾舉  
舉塵中扇高談清潯暑知子不貧賤閒居寡良儔有酒不  
自薦此日亦足醉况得邦之彥小醉須解醒大醉不用醒  
平生慎許可祇有一劉伶太湖三萬頃七十二峰青頗貽  
山水秀閉門修酒經白雲生硯石疎雨洒窓櫺子上三洲

去手杯猶未停

松石軒

蒼松鬱鬱石嵯峨上下因依有女蘿  
虎魄凝流千歲少羣分跪一拳多  
所須爲地期相向遂以名軒示不磨  
賓客定如東閣盛或來醉卧或吟哦

吳徹

徹字文通崇仁人爲陳友諒用事嘗偵太祖軍被  
獲命詠白馬圖黔其面目爲詭譎秀才

西山夜雨

吳厭西山夜雨多也應添起洞庭波  
東風肯與周郎便直上金陵奏凱歌

江西詩徵

卷三十八 元十四

江西詩徵卷三十八

江西詩微卷三十九

南城曾燠賓谷編輯

明

劉崧

崧字子高初名楚泰和人七歲能詩與高啟劉基  
林鴻孫贊諸人各雄一方劉仲脩宋景濂極稱之  
洪武初以人材舉歷官國子司業卒有槎翁詩集

照鏡曲

蟠螭雙銜錦帶紅粧臺刻玉秋玲瓏綵雲忽開紫鸞舞明  
月夜墮香奩中美人粧罷房櫳杳鸚鵡呼寒帳中曉拍簇  
花迎笑靨開低飛黛綠秋娥小滿庭桃李各嬌春顧影含

羞便惱人愁來獨掩雲屏宿手持寶釵扣寒玉吳綿蜀粉  
暗消磨淚滿菱花奈別何不知昨夜愁深淺但覺朝來華  
髮多

秋夜詞

林鳥夜啼金井西蟋蟀在戶聲相齊中天無雲白露下漸  
見梧桐青葉低幽閨此中愁獨曉蘭燈雙照蛾眉小歌聲  
悲逐迴風高掩抑冰絃破清悄弦中語語心自傷低頭却  
看明月光羅衣一夜惜顏色庭草明日沾秋霜甘心霜下  
草祇在堦庭好不作白楊花飛飛洛陽道

荷葉黃

荷葉黃荷葉青四月五月風日清荷葉青荷葉黃八月九

月秋風涼越湖女兒顏似玉隔船窺郎心眼熟赤尾鯉魚  
花下遊白頭鴛鴦露中宿歡會苦乖絕歲月同飛揚王母  
不西遊蛾眉刷秋霜少年之樂樂未央莫遣老大徒悲傷  
獨不見荷葉黃

寄贈余元帥

客從舒城來爲言好舒城寇來不敢近主將專雄兵舳艫  
直長江笳鼓中夜鳴流電激飛砲浮雲夾長旌前衝有游  
騎士卒魚麗行旣戰東城郭復守北郭營開關忽縱擊八  
陣歛縱橫獻捷轅門下日晏賓從盈飲至列綺食迴歌調  
玉笙悵然登高樓四顧但榛荆淮襄旣蕩析江漢何由清  
擊劍挾浮雲彷徨念周京至今戎服事六載憂患并皇眷

有嘉賚思底東南平藩翰有如此爲君誦休聲我實經喪  
亂承懷仲宣情揮涕謝客言感激此平生安得駕雲翼從  
之以東征

詠懷

丁亥七月間閩寇破汀州連城寧化等縣八月間  
已侵石城界余兒子中主藍田黃氏黃悉奔竄山  
中而子中暫止淨果寺今未知出贛否也道里阨  
塞有懷悵然

驚風吹陰霾慘澹從南來羣山不可見贛水流喧厯浮梁  
限舟楫蒼茫使人哀竊聞閩寇發跳梁駕鷲駘嘯呼千百  
輩日甚蟻垤培倒厽等官粟揭竿事行枚汀州前月破屬

縣如綴鋤寨營少構結倉卒羅置毋脫身鋒刃徒潛行哭  
焚灰長纓隕巨弩紫綬竄草萊鄰邑號虎狼具狀檄所該  
月中羽書下郵吏疲鞍隨百步不回頭夜呼城門開人心  
實危慄天意固久回夜者大星墜血色燭九垓見者不及  
瞬曳尾東南隈父老行歎息兒童且嗤咍承平亦既久敢  
謂無遺才干戈在窮谷戰馬或虺隤奔騰捷猿狖何以收  
渠魁石城界其左剽掠易歷咳繁雲接巉壤殺氣侵崇垓  
奈何墟燼者直以封利媒我兄藍田寓阻修困炎埃似聞  
饑竄日飲水不滿杯獨辭主翁宅寄跡蓮花臺消息苦不  
真出灘何悠哉令我引睇之淚眼如凝眊武山當我前落  
日紅燉燉大軍動地至笳鼓生風雷旌旗蔽積水參差迴



雲旄所幸氣候時清霜折羣芳長風肅金氣槁振枯亦摧  
鼎湯寧躍鱗沙日會曝腮終然不遑寐念此懷憂悵起瞻  
華蓋尊紫氣明三台再拜覽餘輝天庭正高俛中原蓄精  
銳金城屹龍堆計日荆棘除道路終恢恢便當引輕纜往  
迎泛汾洞歸來慰親姬爲兄具樽罍復此當幾時愁腸日  
周廻仰彼林表翮雙飛故羣誰憐失羣鳥悲鳴正徘徊  
送孫民瞻之廣西帥閩照磨

蔚蔚城闌柳長條當路岐行人服王命策馬厲所之登高  
望羣山馬鳴風正悲天連江廣交雲隱湖湘湄向西有大  
府冠蓋何逶迤分閫控百蠻元戎總前麾簡書豈不畏舒  
卷在所持幘彼猶獫狁惟耽恒蚩蚩絲毫苟失御讐殺相

紛披聞君去叅幕道路今衍夷兩江動晴色八桂含春姿  
王爵有優劣官資無崇卑烈烈塞上笳泠泠月中吹感激  
丈夫氣豈不在邊陲聖人重文德斯道貴撫綏慎爾錄邊  
勲勉爲古人思

送郭韜之豫章

鼓瑟送行客調高難爲情感君萬里心爲作秦中聲紛紛  
江南弄中有鳴鳳曲靜聽諧古心毋爲眩煩促

南園灌隱詩

寇盜未殄東南騷然吾友王子啟方集隱城隙灌  
畦以供具其志節可尙已因賦詩以道之

苦無千丈流沃此萬里焦獨尋南園隱灌畦以逍遙亢夏

天勢高盤地不見水鑿深地骨出常恐見骨髓朝抱一甕  
出暮抱一甕歸草間行道微茨蔓沾人衣良苗灌難蘇惡  
草苦不死一日灌十畦采之不盈筐歡然對蒸藿似欲忘  
朝饑雨露自天澤勞生須有期

園居雜興

啟窓面修竹下蔭方池幽茲晨微雨至其氣颯以秋芳時  
如佳人徂矣安可留草木性已定禽魚狎其儔披襟納良  
風掩卷睨崇邱所欣城郭遙歸哉此優游

北園蒔嘉蔬生長各以時入夏風雨多衆草叢沒之夕花  
豈不榮晨蔓亦自滋終然因採掇濯濯餘空枝我貧本食  
力淡淡固其宜拔本懼有違補善非自私

種桃在牆陰枝幹數尺長今年始作花秋實已可嘗北園  
豈無李西塢亦有桑勉爲衣食貴耕種安可忘里胥昨相  
過錄我桑果場新令有嚴課民生固其常相送里胥去悲  
歌念時康

荷鋤出東臬我忝忽已苗苗短不自持百草勢轉驕良苗  
異本根蕪穢乃獨超敢辭藉耘勤永媿雨露饒周雅永思  
古王風竟頽凋人生重所務豈獨在夕朝

藝麻本欲疎本疎乃繁殖小人務多種偏迕傷天瘠離離  
葉間花叟叟雨中實秋陽勢方烈日夜蕃所息寡欲而務  
滋吾將食其力

獵犬篇

晨起同出獵跳梁相呌嗥歲久識主情指顧能周遭山石  
穿我蹄荆棘冒我毛爲主逐肥鮮不辭奔走勞窮深扶幽  
險狂狡焉得逃啞血不顧餘一飽隨所遭主人獲雉歸意  
氣方盛豪釁然妥其尾偃卧牆東蒿

二月八日對酒

對此春日酒高堂樂未央客從州城來懷牒促我裝問客  
今何爲求賢寘周行麾觴忽歎息我豈時所良少小適情  
直窮棲戀閒荒譬彼蓬下鷦敢懷雲中翔岐路今已多素  
絲惜何長念之不成歡展轉中懷傷

兵後過故里

種粟向南隴藝下蒲東甯不辭終歲勤食力在所期維時

失總御疆土有侵移戎馬無定交彼此更戍之稠載已不  
遺征責方在茲三農舍之去離析當告誰念昔勸墾闢里  
胥費言辭如何場圃間滿目但蒿藜

壬辰感事

生長承平日亂離非所知垂髫讀史書痛彼艱危辭儒紳  
謝徭役生理固云夷雖無二頃田亦不蒙寒饑歲時洽親  
故聊厚相娛嬉出門不賫糧四達隨所之萬里若戶庭道  
路方伾伾牛羊被原野桑麻翳邊陲四方絕爭鬪兵寢城  
亦鑒積薪而厝火治道乃曰虧理亂自相乘誰歟敢猖披  
猖披者誰子昉自邪說興香火崇幻教肇彼有髮僧其源  
始涓灑弗遏終沸騰宜陽一倡亂和者紛駕乘赭巾忽充

道殺戮相憑陵蔑法恃妖讖江淮竟先登古來心腹地廣  
衍德所稱乃知爲厲階不在憑邱陵

汝頹始媒孽徐沛乃蠶起浸淫及荆湘浩蕩入彭蠡風搖  
草木動殺氣薄炎紀倉皇九江守血戰扼孤壘海門白日  
暝烈士先門死雄波失天塹北舸竟南艤我師豈不銳勢  
奮易披靡歎息江之流艱危欲誰倚

豫章屹孤城出戰當水背退移石頭渡橋絕偶奔潰紅塵  
蔽江水白晝驚慘昧呼號振淵渾山石忽破碎桓桓章將  
車勇銳百夫倍登城一指揮奮擊出前隊戈船久遮列堅  
壁方擁對隄防蓼洲急控扼龍沙會自斷忽縱燎危哉吸  
蓬塊斯人盛經綸兵畧衆所戴肘腋將弗支誰從振其臂

寇移石頭渡南掠烏山驛新吳與修水變起何絡繹長驅  
逼筠陽守者亦堅壁連雪忽傾陷烈焰半天赤猖狂府中  
坐慘酷肆糴磔黠媚婦女羣爛漫金帛積倒倉散游憐奪  
印援寇逆坐令荷耒民反戈半紅幘人情苦遑惑王事方  
否隔摧廓諒匪難荒荒濟危策

廬陵古名郡繁盛何雄哉井邑十萬家一炬同飛灰寇來  
背南岑豕突勢莫摧白晝呼市中城門四邊開居民望南  
走千步不一回官馬如流星絕橋竄山隈府中方繕兵填  
委粟與財我糧寇之資我兵寇之媒一罅弗自謹致此千  
丈顏向來闐闐區赤地生莓苔慎勿東望之茫然使心哀

賦白馬祠送曾照磨領兵防龍泉寇



將軍騎白馬朝出西門道初日射旂竿秋風動原草問君  
此何之鞍馬甚光儀新承大夫命去逐紅巾兒簫鳴武溪  
曲鞭指石州路手持白羽箭却射林間虎深行五十里提  
卒三千人定搆中軍帳獨清西北塵丈夫誓殺賊老劍耀  
如雪簫鼓城南樓歸來宴明月送君白馬祠因唸白馬篇  
殷勤折楊柳贈比珊瑚鞭

凶年民有棄子於江者詩以寄哀

骨肉豈不親無食難爲恩抱子棄水中哭聲吐復吞母饑  
骨髓枯兒饑眼眶出終焉兩存難何以其憂恤歲月不相  
貸恩愛從此分我死尚可忍兒啼那復聞兒啼那復聞江  
水流浩浩不忍回視之唧悲入秋草

舍弟往三壩嶺尋解子日夕未歸坐候林下

西林已雞栖北澗復蟲響沉沉四山暝寥寥一星土時危  
劇鍾情期逝勞紆想悵立此溪陰欲休未能往

贈蕭忻

蕭忻辭我行有淚迸若雨倉皇奉旅殞躑躅望鄉宇主家  
隔萬里生死托童豎恒焉感恩義誓不避艱苦路人爲歎  
息來與陳酒脯古有不反藥忻能瘞其主無子本足悲有  
子焉足數作詩贈蕭忻庶以厲忠矩

秋夜南溪席上聽鄔和卿胡琴歌時和卿留袁城將  
歸西昌

空山無雲風葉靜酒行高堂燭垂燼鄔郎起控二絃琴一

曲新聲發孤咏泠泠滴滴絃初調欲語乍吞聲忽飄龍頭  
宛曲轉秋玉馬尾振蕩迴春嬌紫紆往復騰嫋嫋宮換商  
移被清悄綵鸞笑倡出花間斷鴈呼羣入雲杪滿堂賓客  
慘不譁側耳如到仙人家乃知營中歌勅勒不獨馬上寫  
琵琶我從往年客燕薊鐵笛悲歌亂人意歸來華髮映清  
尊坐感商音一流涕鴈郎好手早得名豈可久滯宜陽城  
太常此去徵絕藝會奏法曲升天行

宮牆樹

并序

宮牆樹哀黃府史也壬辰之亂府史死廬陵郡庠  
柏樹下事載劉永之所爲傳府史之子載以傳示  
余而其言甚悲因作宮牆樹以哀之

宮牆樹乃是青青柏勁莖山來氣拂雲堅剛況復心如鐵  
枝間豈少王褒淚土中定有萋宏血事往空遺國士悲年  
深尙記鄉人說宮牆柏何青青千古萬古遺精靈宮牆若  
傾柏樹折府君之名應不滅

紫髯使君歌爲本拙呂僉憲賦

紫髯使君顏雪色八尺長身鬚光黑前年奉詔出承明萬  
里觀風來薊北肅政堂前喜遇君共持使節登青雲君乘  
鐵驄踏霜月燕南渤海皆澄氛憶我丘曹初釋屨看君兩  
厯中書幕已從秋貳拜天官復報司常奉祠禴殿庭奏對  
先六曹春花如錦羽宮袍象牙牌促中使急玉笋班出瑞  
林高當時追趨赤墀下彩帔雜佩光相射寧知此地復相

逢三見飛鴻送秋社朝隨升堂坐莫逐騎馬歸林間日上  
烏鵲喜井上花落黃鵬飛花開花落春風起雲去雲來山  
色裏怡然不笑亦不嗔手把芙蓉看秋水向來車馬都城  
道甲第高門跡如掃題詩愛贈呂仙八惟有黃州玉堂老  
我憐塵土得暫親豈有風采稱朝紳青山對面雨愁客白  
髮滿頭花笑人嗟君自是真仙骨廊廟才華正英發好從  
雙闕觀紅雲却上三山弄明月君家舊住淮河湄投簪莫  
載當何時春申臺前沽美酒爛柯山下看殘棋

贈北平都指揮胡昭勇歌

憶昔出使南海頭將軍開府當雄州樓船戈甲三十萬海  
波不動魚龍愁越王臺前東風起我復詠潮上滇水木綿

花發照天紅正月鶯啼榕樹裏  
軍宴客華筵開碧幢畫  
鼓聲如雷起傾荔漿酌柳斗問  
誰此別何時來明朝驅馬  
還東去長憶虎頭相別處清夢  
時隨海月回狂心遠逐秋  
鴻度君從東歸省墓田闕下重  
逢心惘然豈知移鎮出海  
嶠握手乃在渾河邊渾河十月  
冰如堵白日飛沙暗榛莽  
雪中千騎出居庸手挽雕弓射  
彪虎君陪上將臨邊防我  
握憲節凌清霜看君號勇有  
如此安得攬轡同飛揚山後  
諸州數千里拓地橫行空未  
已爲君擬頌勒燕山盡掃  
狼  
居報天子

### 椎冰行

襄河冰堅厚如掌揚州北去船難上  
船頭持火照椎冰萬

江表志卷三十一  
杵千篙動清響冰開一步進一程三晉不到高郵城夜寒  
月黑北風急舟人獨擁冰椎泣

### 大清河

大清河渾流漉南黃河清清河今河不與古名同自是河  
流有反覆君不見安山直下粟阿時一斛之水數斗泥徐  
州呂梁走下陘可以照見人鬚眉清河北河入北海黃河  
入淮東入海彼此爭流不相待兩水清濁各自流終然到  
海同一瀉東流北流君莫愁

### 織女吟贈黃進賢

憶昔束髮初嬌倚雲錦機折花事戲劇大詫身上衣一從  
十五時學向機中織絲短愁苦長梭緩心轉急永夜蘭燈

懸洞房門前梧葉零秋霜寒手凍絲緒亂絡緯悲啼金  
井床春花更疊黃金縷花底青鸞蹴烟霧東風何日天上  
來擬奉君王宴歌舞十日蒲匳恒苦遲一夕停梭生網絲  
持刀沈吟剪秋水粉淚欲落愁風吹遠懷素心人邈在千  
里道何因托交權持此永相保東鄰小姬昔同年至今盛  
飾爲母憐幾回月高鳴杼軸正是他家夜彈曲

### 南山謠

淮西流民望南徙掠財盡入南山裏裹槍負挺八十人拒  
敵鄉民四人死流民只說江西熟得食仍喫食無肉扶傷  
救死官不聞鄉民還對流民哭東家擊豕西家牛撒屋燒  
火當街頭自言性命如糞土一死不異淮西州鄉民不怕



逢豺虎其承只怕流民怒老翁夜出燒紙錢祈神夜送流  
民去從今莫願多豐年第一莫旱淮西田流民不來貧亦  
好難犬全家永相保

謁靖安昭靈廟賦東袁茂才

昭靈古祠蔚森爽祠下流波日奔蕩啼鴉枯柳當兩楹落  
日青峯照銀榜秭歸西阻蜀江口雲蓋風興自來往常時  
醴酒擊鳴鼓輒有靈風動虛幌楚王宮殿久寂寞萬里晴  
雲色若恍神龍自合晦淵潛鳳鳥胡爲在羅網此邦祠宇  
出何代恍忽湘楚同風壤石竹叢深山鬼愁江籬花落文  
魚上清秋旅懷百憂集感子追遊慰遐賞明時禮樂徧寰  
宇肯使幽忠滯榛莽亭儀每詔縣官給祀典猶聞宗伯掌

捍災禦患光故國憤義終能肅羣仰湘南屯戍苦未休長  
嘯因之起悲愴

孫太守伯剛許送趙吳興墨竹圖賦短歌以促之

孫侯高堂竹石圖筆意迥與尋常殊山城五月困炎暑坐  
我如對寒冰壺侯言此圖不易得吳興趙公好風格昔者  
親逢落筆時璽紙寒翻雪花色竹叢隱石石作堆海氣亂  
拂秋雲開夫人當坐其歎息松雪齋前風雨來承平館閣  
日多暇承制文章此其亞往事蒼茫四十年萬里江南見  
遺畫當時亦有隴西公直以健筆爭相雄豈知書法自無  
敵况爾熟閱誰能同楚也懷賢心未已東髮臨池費千紙  
可憐生晚墮窮荒不見巾朝盛才美昨朝會宴池南亭臨

圖慷慨思吳興停杯憐我重真蹟許以捲贈無難形吁嗟  
吳興不可作孫侯高誼猶堪托便令清曉送瓊枝卽掃茅  
堂看金錯

胡郎奪賊馬歌

往年寇逼西昌門寇來愈近人愈奔胡郎憤擁長戈出三  
人同行一人逸賊馳高馬先入城胡郎撲賊絕馬纓大呼  
陳郎急縛賊自奪賊馬歸行營行營主將氣如虎獻馬俘  
囚萬夫舞陳郎受賞胡郎辭誓立奇功報官府時平事遠  
名空存主將身沒功誰論猖狂扼腕詆時事有身雖貧寧  
畏死武山落日金鉏紅至今殺氣蟠秋空東家得官金滿  
帶歎息胡郎打碑賣

促促歌

彈刀作歌聲促促深林雀子黃鸝肉紅船打泊大江心口  
唱山前圍陣曲短襦盡着婦女衣影纓如血凌風飛自矜  
主將重驍勇扶醉當筵騎馬歸水營小軍舊推獎昨日新  
陞萬夫長掠地還牽農父牛殺人更請官中賞帳前歌舞  
日紛紛坐看隔江羊犬羣傳說山前多警報無人說着大  
將軍

夜出羅村

蛇矛捎雲烟滿溪火光照山聞馬蹄暴見夜半打平寨陽  
村峴頭江路大夢中驚竄迷東西十步九踣傷淤泥母號  
女啼不相顧冥冥驅牛入山去

啄木鳥

啄木鳥嘴長翼短栖木杪空山時時聞一聲木皮剝落非  
爾情此鳥不肥莫彈射木中有蠹無人識

南鄉怨歌

我家承平住城郭自從亂來徙村落朝朝臨河望烽火只  
怕江船向南泊今年李寇打南鄉五更馬蹄踏月光小船  
載軍大船馬旗頭直擣珠林下鄉夫捲地散如烟哨馬已  
過前山頭盡殺丁男勸婦女手麾牛羣雨中去前軍出營  
後軍續晝夜抽刀草間宿縛人先問窖中金放火還燒隴  
頭粟先鋒最說姚府軍火伴却是州城人金粧盡作姚家  
扮面目雖馴誰敢喚人家兵過無遺物萬落千村總蕭瑟

室廬灰燼盆盎空只有田園將不得君不聞東鄰一老叟  
向來家業餘升斗不論賤價賣花銀又向城中贖生口

採野菜

採野菜行且顧野田雨深泥沒路稚男小女挈筐籠清晨  
各向田中去茫茫四野烟火絕去年秋旱今年雪草根凍  
死無寸青却攬枯荻淚流血水邊蒲荇未作芽甘薺出泥  
先放花長條大葉瘦且老得似家園菰韭好枯腸誓滿終  
易飢酸苦螯人還自知採野菜行且哭貧家食菜苦不足  
寒軍掠人還食肉

養牛嘆

田家養牛如養子愛惜皮毛少鞭箠一冬霜雪無青草還

餒鹽羹齏糠粃全家性命繫一牛牛肥卽喜瘦卽愁木闌  
土屋護乾煖出入更防人夜偷亂來買牛如買馬典盡春  
衣酬買價寸田尺土未得耕軍來牽牛誰敢爭攔街號哭  
送牛去青草空餘舊眠處君看新來山寨軍前日亦是耕  
鋤人卽今打糧不耕土身著牛皮食牛脯

曉起

樓笳低塞雁鄰火起庭鴉城歎征人柝門喧過客車風枝  
塗白露霜葉覆黃沙底事邊隅夢經時不到家

和子與王先生夏日途中望武山

日高南澗午雲度北巖陰坐石依行樹聽泉醒渴心遙望  
西華觀微聞鐘磬音烟霞石磴晚誰與其清吟

野寺臨溪古方橋駕石牢雲車停遠蓋風樹隱虛濤赤日  
南天迥青巘北斗高却思燕地冷雪椀送冰桃

宿西華有懷蕭鵬舉併柬同遊者

山光上寥閭海氣接鴻龐月近全當戶天垂半入江買泉  
蒼石洞送酒白雲窻却憶滁陽客東遊滯短艣

登石華山遇雨

西候浮邱伯東瞻石華峯松陰初歇馬雲氣已乘龍急雨  
沾嵯谷長風下檜松殷勤雨仙女持贈玉芙蓉

淮甸

淮甸今焚掠紛紛日異聞遠侵三楚地近隔九江雲鄰省  
圍邊將親王進衛軍由來王國內不在策奇勲



江閣晚望次嚴煥韻

落日明秋燧江空生夕波  
閣前歌吹少城下戰船多  
望眼懸飛檄愁心倚太阿  
王師猶駐馬誰遣問如何

兵亂

羣盜猶相煽官軍且未來  
四山烟霧塞一水道途開  
近郭豺虎春田半草萊  
時時消息異嗚咽壯心哀

九月感事

山寇能騎馬官軍解掠人  
徒然糜國賦何以淨邊塵  
周雅歌三捷苗頑格七旬  
又聞寬詔下誰忍負深仁  
鍾步時傳警新安久被圍  
鄉山孤壘在戍卒幾人歸  
夜月喧鳴柝秋霜裂戰衣  
艱危依主將羽檄夜頻飛

聞道瀘江破傷心却復疑六年猶力抗羣盜竟獨拔壯士  
乘危數官軍出援遲幾人全骨肉夜走哭荒陂

題田舍壁

門巷帶青楓村西有路通鳥鳴高竹上水落亂藤中  
常時慣招遊舊俗同寄言城市客未可薄田翁

感賦

閃閃一星赤西林夜色高乾坤自空濶風物故蕭騷  
庭迥栖涼葉門深翳雨蒿狐狸渾不見竟夕向人嗥

中郡秋防寇邊亭夜築關遙聞大軍出定向幾時還  
粟仰南船運弓從北騎彎侵尋寒落景何處問溪山

白髮前朝叟偏傷喪亂頻泣逢南上卒驚問北來人  
老大

心情異艱危世變新眼前憐稚子蕭颯向風塵

離里良別寺僧則師

羈旅諳空寂高秋感去留誰能棄妻子世已換王侯故里  
腸初斷荒山血夜流敢違桑下戒誓作海東遊

乙巳閏十月十五日聞永新破諸寇就戮無遺喜賦  
三十二韻

鼓亂雄諸郡憑凶踣十年荆湖延毒霧漢沔注妖躔鳥獸  
寧殊類龍蛇自一川羽毛初景附苞葉忽根連掠野時乘  
間攻城亦破堅踐攘螻蟻甚累係犬羊然里錄先鋒籍家  
亾世葉田鯨吞那有閒席卷欲無前割奪封疆盛依乘節  
制專公侯淒淒喪狗奴隸歛登仙白日驚雷破炎天積雪懸

存亡覘貨賄喜怒信刀鋌誅責窮黷糶需求到甕甕寡妻  
牽雨後庀子負冰楸徭役家家急科徵處處煎田廬久焚  
落衣履極窮穿憐矣生民禍居然鬻土煽積金明別塢陳  
粟閤荒烟列地朱甍壯層城畫堞鮮椎牛醺玉醴躍馬鑄  
金鞭事楚終懷譎盟邾或撓權郊端兵屢挫城下檄虛傳  
苟不罹勅敵能無感彼天假名徒虎負就縛竟蟬聯夜謀  
披心脅晨登奪旆旆剗腸剝狐鼠啄腦任烏鳶螭強噬何  
在繁華摠棄捐掃除應假手覆敗已駢肩野昔畊無贖民  
生坐有鵲飛霜收殺氣清旭麗居廬禾水春前綠屏山雪  
後妍遺氓喜相勞早晚賦東旋

寄萬德躬

江西南昌府志卷三十一  
日暮山風吹女蘿故人舟楫定如何  
呂仙祠下寒砧急帝子閣前秋水多  
閩海風塵鳴戍鼓江湖烟雨暗漁簑  
何時醉把黃花酒聽爾南征長短歌

棲霞觀

青湖嶺下入棲霞縹緲玉清仙子家  
宮殿春移九芝蓋雲烟盡下五華車  
冥冥古柏含溪雨短短青蒲隱岸沙  
藥臼丹瓢那可問高原殘日散桑麻

謁古石固祠因觀宋高宗御賜遺物

亂山盤束五龍堆萬木蕭森一逕開  
白淵灘聲兼地動空峒雲氣渡江來  
柘袍鸞鳳輝寒日寶帶山河拱上台  
古廟丹青猶赫奕百年遺物使人哀

感懷

將軍屯戍落秋風  
客子離思逐暮鴻  
書劍遠投州瘴外  
鼓笳淒斷月明中  
野猿引子溪藤綠  
山麝眠香石竹紅  
涼氣蕭森盤雨峽  
直愁華露隕高楓

繡谷峰前濯冷泉  
金精洞口望飛仙  
東南奔走祇自厭  
歲月飄零誰與憐  
風細柳營秋瑟瑟  
日高花館露娟娟  
短衣荷鍤應吾事  
欲向隣村種石田

奉和劉侯對月

深沈鼓角動重關  
迢遞星河近暮山  
卧匣寶刀鸚尾白  
懸門弓張虎文斑  
石林寒落鞬鷹急  
原草秋肥廐馬閑  
忽憶海天南討日  
月中飛箭下黎蠻

匡山砦中奉和梅南劉府推韻呈公望楊主簿

萬里旌旗在眼中  
千崖寒色待春風  
愁來自少登臨樂  
亂定誰論戰伐功  
桂嶺天長雲似馬  
槎灘波淨月如弓  
白頭幕府憂時切  
此日題詩感慨同

和答萬詡

家住雲亭海水東  
亂來門巷往還空  
避時猶擬尋秦洞  
獻賦虛懷謁漢宮  
松塢乍晴鳥啄雪  
桑林欲暮鳥呼風  
感君晏歲能相顧  
尊酒誰知寂寞同

奉寄辛檢校好禮總兵進賢之北山

省郎何處屯兵久  
彭蠡湖西是北山  
飛箭定穿蹲虎石  
放船時過落星灣  
五年魚鳥知營陣  
百里樵蘇絕塞關  
聞說

嘯臺高百尺題詩頻寄故人還

奉和李府判行華九日遊三華山

仙居遠在三華頂使節真成九日遊別洞幡幢通上界亂  
山烽火隔南州雕弓隱月啼猿晚玉帳連雲斷鴈秋聞說  
岩扉題句後綵霞長護殿西頭

過武溪江南弔故人劉仲美墓

惆悵江南土一抔斯人地上不勝憂爲親奉檄嗟何及忍  
病吟詩死未休澤國風塵行處晚海天烟雨夢中秋故人  
題碣知何日卽恐荒漫失故邱

攜妻子入石龍山

十年奔走困風埃此日飄蓬未擬回謾說管寧浮海去真



成龍德入山來窺猿驚挽崖藤落尋鹿疑逢石壁開從此  
畏人問名姓短衣草具儘徘徊

仲冬二日由下徑輿疾還珠林悼風景之頓殊幸茆  
廬之無恙喜賦一首

村橋路斷日無光不似常時入故鄉野鼠穴糧依蔓草田  
烏啼子上枯桑偶逢遺老兒孫盡欲問西隣井竈荒慚愧  
竹西池上路依然風雨一茆堂

東園雨坐書懷

烏白鳴春花自開離人去住總興哀荒村道路兼泥潦故  
里田廬半草萊萬姓瘡痍誰復問羣雄爪角自相摧東南  
竟日愁昏黑消息虛傳首屣回

哭曠伯達

誰云死別且吞聲四海相知一友生金石消磨心尚在雨  
雲翻覆事難平兵前有檄求顏闔江上何人襲禰衡文字  
飄零家室散爲君忍淚記深情

水口田家

水口山腰三四家楓林茆屋帶蒼葭野人敲火夜然竹溪  
女踏雲朝浣紗水落寒潭魚可捕草肥秋壠兔堪畱有時  
刀槩還登砦雞犬蕭蕭隔暮霞

早春登古城和羅惠卿

顓江清抱古城東春日登臨思不窮兵後人家寒草外燒  
餘僧寺夕陽中粵臺曾駐東朝跡陳壘猶傳北伐功長憶

來遊鐘磬靜獨憑高閣聽松風

將歸南平發舟喜賦

梅濱山前聞鴈來珠湖渡口放船回晚雲出嶺作疎雨秋水滿江生綠苔故里風烟頻入夢中年世事獨興哀飄搖莫戀詩千首斷送深憑酒一杯

寄水南劉叔和羅惠卿併古城竺西上人

故園一別向秋風無數離愁逐斷鴻鏡裏髮從今歲白尊前花憶去年紅鹿門杳杳遺龐德廬阜蒼蒼闕遠公相憶何由謝塵鞅暮雲愁絕大江東

有懷王太守子啟時爲崇慶府往時子啟自廣西赴京與予相見未幾予赴官北平嘗約叙別以病阻未

至

二十年來南浦客八千里外錦城仙  
水邊送別秋風早馬上懷人夜月圓  
載酒渡江憐往日聽猿出峽定何年  
只今飄泊桑乾曲西望酣歌一惘然

曠子南園清夜遊憶曾放棹過中洲  
花間吹笛啼青鳳竹底燒燈走翠虬  
一月醉來渾不醒十年老去謾多憂  
庭前想見青青樹依舊梅花滿上頭

將至東阿喜望隔河穀城諸山

一望川原蒼莽間天低風定凍雲閑  
河經南堰還歸海路出東阿始見山  
野雪漸消沙隱隱燒烟初散草斑斑  
遙憐黃石遺祠在千古高名不可攀

七月七日東原席上喜賦示子彥弟

經年江郢橫經去投檄歸來又早秋老去不煩文乞巧豪  
來直倚酒忘憂故家譜牒懷三傑並世衣冠愧二劉珍重  
手中蒼玉杖白頭林下儘嬉遊

古意

上馬拂春衣金鞭獨自揮蛾眉鏡中好但恨不能飛  
傳語通州估南船甚日還黃金知易得留取鑄紅顏  
夫婿泛淮船關門一步前如何中夜夢却在大江邊

月落

月落山正昏羣鳥亂鳴起客子夜巾行相呼渡烟水

題孫碧霄畫四時小景爲王存睿賦

遙山樓觀隱晴霞  
芳樹庭臺瞰浦沙  
白鷺驚人忽飛去  
滿湖風動綠荷花

題杜草堂戴笠小像

杜陵短褐髩如絲  
飯顆淒涼日午時  
爲報西流夜郎客  
錦袍霜冷更相思

題蘆鴈小景

蘆花霜滿釣魚磯  
江上征人久未歸  
天北荒涼人似水  
年惟有鴈南飛

過柳溪道院

岸上誰家掩素扉  
鳥啼渾似惜春暉  
日斜深巷無人過  
時見梨花一片飛

入山

二月攜家又入山紛紛爭戰往來間  
草堂落盡梨花雪過却清明未擬還

見種松苗者

少壯從軍事戰征東南十載廢春耕  
老翁遠作諸孫計閑種松苗待太平

山石門灘舟行書所見

放船出峽遇回風石角參差盡向東  
貪看好山如走馬不知波浪入船中

題雨竹

滄波石面晚陰涼翠篠娟娟過雨香  
何許鷓鴣啼不斷黃鸝啼不住綠楊

駐謁下是三淵

望漢獻王陵

單家橋下雪橫冰  
草樹連雲掠凍鷹  
漢業已荒河水在  
行人遙指獻王陵

河上謠

青陽溝下是黃河  
三月春深風浪多  
河中石子白磊磊  
河水自渾君奈何

家住黃河相見灣  
灣頭道路古來難  
十度船來九度見  
耶行自隔萬重山

東方行

東方閃閃啼早鴉  
美人愁眠隔窓紗  
桐華樹下人來往  
銀



牀轆轤夢中響

姑蘇曲

姑蘇城頭烏夜啼姑蘇臺上風淒淒芙蓉露冷秋香死美人夜泣雙蛾低銅龍咽寒更漏促手撥繁絃轉紅玉鴛鴦飛去屢廊空猶唱吳宮舊時曲

游三華山

龍門兩山負一水下迴繞蒼峽忽中開飛橋出林杪盤盤石磴引羈羈松林省危闌正西挂層閣復東繚樹暗盡含寒花明忽聞鳥懸厓傍架棧鑿石潛通突早聞三仙人棲花迹已杳常疑雲月上顏色靚清皎丹井舊時深朝真亂來少荒壇翳霜兼虛館闕叢篠凝神觀衆妙屏迹謝羣擾

懷賢嘯重憩振翼思遠矯佳境能娛人何因致清醪

江千草居

江千慙幽屏草扉亦常關晚塗斷歸人虛市見寒山林木  
變冬候緜綠忽已殷鳴鳥相因依孤雲時去還唐虞旣云  
遠慨此時獨艱四體豈不勤我髮日已斑敖遊千載上偃  
仰一室間樂詠古人書庶幾無覩顏

題秋江待渡圖爲蕭學士賦

小航衝風岸將及行人下馬沙頭立水闊雲深野渡閒天  
寒日暮歸心急人生行役安可休到江路盡還通舟誰能  
裹足山中老不識風波一日愁

題余仲揚畫山水圖爲余自安賦

金華仙人余仲揚筆墨蕭疎開老蒼昨看新圖湖上宅烟  
露白日生高堂層峰上蟠石竒竒絕島下瞰江茫茫長松  
竝立各千丈間以灌木相低昂松下上人坐碧草秋影忽  
落衣巾涼囊琴未發絃未奏已覺流水聲洋洋赤城霞氣  
通鴈蕩巫峽雨色來瀟湘誰能千里坐致此欲往久歎河  
無梁風塵漲天蔽吳楚六年悵望神慘傷元猿苦啼巖北  
樹白鴈不到江南鄉赭山焚林絕人迹如此山水非尋常  
此圖本爲自安寫亦感同姓悲殊方幽軒素壁泉聲動對  
此令我心爲狂何由捫蘿逐麋鹿振衣直上雲中岡登臨  
一寫漂泊恨長嘯清風生八荒

題溪山春晚圖寄贈蕭翀

土山載石石角傾，偃樹雜出如幢旌。青天微茫曉色動，雨  
氣合沓千峰晴。野橋西邊有村路，之子鳴鞘踏雲去。重巖  
花發似聞香，隔水鶯啼不知處。東南連年飛戰塵，如此山  
水何清新。石田到處長荆棘，豈有荷耒春耕人。我昨西遊  
登武姥，手挾雲霞望仙府。把酒忽逢東海生，醉卧溪南紫  
蘿雨。紫蘿陰陰覆巖扉，十日尋幽行未歸。雲峰流泉半空  
落，六月飛雪霑人衣。拂衣歸隱知何日，却對畫圖心若失。  
不聞流水渡溪還，時見浮雲向山出。懷哉桃花修竹林，江  
海秋高煙霧深。豈無耕釣在田野，誰識悠悠沮溺心。

寄曾郁文短歌

澄江水向東流，流向東昌江上頭。我有故人在江上，十年

不見增煩憂白沙水聲寒活活黃巖雲氣凝清秋豈無沙  
棠榷吳女謳可以載酒同遨遊狂風吹山波浪惡使我不  
得回輕舟翩翩雲中雙飛燕衙書寄我頻留戀書中展轉  
道深情但恨相思不相見春燕飛來秋復歸報書不遣壯  
心違碧蘭紫蕙何由采卽恐蕭條霜露稀

題曾郁文所藏山水小景

隔溪望見林間屋沙渚陰陰俯羣木溪流合處一橋孤春  
雨來時萬山綠江南此景直可憐米家筆意誰能傳却憶  
故廬珠浦上短籬長繫釣魚船

張氏溪亭雜興

草閣經秋靜柴扉近水開霜林收橘柚風磴坐莓苔釣艇

寒初放樵歌晚獨回城南車馬地欲往更徘徊  
寒霧依山歛晴沙與岸頽林塘無路入窗戶有時開野客  
鈔書去鄰翁送酒來幽明在蘿薜莫遣暮鐘催

再懷伯兒子中時有同客興國者從間道先歸兄以  
道阻後期不果

貧賤輕離別艱危昧死生獨違同里伴仍阻異鄉程愛想  
深山憩愁聞間道行幾時秋樹下慰此淚縱橫

### 入城

江水依然抱石磯獨行空感舊游非晚山當戶日初落秋  
草滿城人未歸田鼠引羣穿井出山雞求食傍簷飛向來  
車馬東門路忽憶朋游淚滿衣

漫興

山下碧溪渾欲平  
溪邊春事總關情  
定巢新燕忽雙過  
隔水雛鶯時一鳴  
凍人秧畦愁近雪  
光涵風浦愛新晴  
南園草綠無人到  
應是滿林春筍生

客情

清明已過寒雨稀  
客情物色共依依  
微庭前幽草忽如積  
江上落花渾欲飛  
風雲慘澹隨長戟  
塵土蕭條上短衣  
雲亭江上麥田熟  
昨夜月明還夢歸

峭壁蘭

巖石下陰陰  
猗蘭綠如翦  
花發人不知  
秋香入苔蘚

步月

乘涼步月過西隣  
草露霏微濕葛巾  
一逕竹陰無犬吠  
飛螢來往暗隨人

正月十九日

金魚洲下放船開  
華石潭邊看雨來  
愛殺南天雙白鷺  
青山盡處却飛回

題枯木竹石

木葉欲脫天雨霜  
竹枝乍低風已涼  
三湘落日流波白  
行子繫船思故鄉

題三岡寺

石橋流水帶人家  
紫殿春陰閣岸沙  
啼鳥數聲山雨歇  
門前落盡白桐花

江西詩徵

卷三十九

明一

三



寒夜

馬齕枯荻寒夜長風如箭鏃射陰房不知門外三更雪誤  
起開門看月光

送別叔銘出順承門

送客出城秋已涼太行南上楚天長順承門外斜陽裏薔  
麥花開似故鄉

劉紹

紹字子憲以字行自號緯蕭野人新城人年十二  
應童子舉洪武初官翰林應奉文字與宋景濂徐  
用之諸公爲友致仕歸自治坵壠題其碑曰詩人  
劉紹墓張光啟編其詩入元音遺響

歲寒三友詩

董子時荅鄉先生張萬里

君子虛心問大夫梅花何事不稱呼  
梅花細荅松和竹識得和羹手也無

秋懷

竟歲寡歡緒閒時俯東軒  
秋風意蕭瑟愛此寒榮妍  
曄曄浥朝露芳馨比荃蘭  
食英豈無志守此冰霜堅  
忽與念榮悴俛焉默無言

綱俗結紆軫易初吾弗爲  
臨流采香薄日與佳人期  
舉世厭芳草薰藉以同施  
撫襟悵余懷策駕臨海涯  
聞有魯連子千金藥如遺  
高情倘可起攜手斯與歸

夙抱尙林壑淨榮非素謀  
一命已七載伐檀誠自羞  
晨出

北郭門浩然思清秋黃虞翳榛莽落日馳耕邱惟餘故鄉  
念愴慨與悲謳

夜中起長嘆仰視明月輝驚雀栖不定吾生亦何依彈劍  
拂秋蘊含悽步前墀秋霜草華落歲月詎我稽感往事難  
復念來情亦悲無將契元理委順斯不疑

陰陽鼓靈籥日月如轉丸官官神化運誰能測其端春陽  
美萬物秋露淒以寒乘時變榮悴天道終何言

高步視六合河山邈悠悠浮雲西北來慘淡增我憂世乏  
稷卨儔皇皇將焉求乾坤妙闡闢元氣浩不收經綸信有  
待明哲奚淹留自非遺世士何能守斯邱

雜詩示宰獻

朝出北郭門莫登西郭山不見采薇人倚松但何言涼風  
振林薄密雲翳岡巒淒淒鳴鳩鳴心事如波瀾衆世不尙  
異醕糟豈非難諒持獨醒理尙友三閭賢  
日暮懷所思涉江采芳澤飄飄蘭蕙花春氣瀟南國如何  
同心人言笑千里隔采之不成遺中道真愉悵淒風忽悲  
鳴鳩聲惻惻恒恐芳意摧榮華不常得

送王潤之官陝西

遠宦入秦關雞鳴肅征袂咸陽秋莽蒼古水咽清渭登臨  
盼形勝立馬慨興廢落日照終南行人在空翠淒涼鄉國  
念慘淡遊子意孰和莊舄吟遐思渺天外翳余契金石惜  
別勞夢寐何所更持情臨分乏瓊琬

鍾山曉晴圖爲尙書生陳宗進賦

靈崖多幽姿朝日射翠微丹黃日其顛絳氣蔚以彌璨璨  
梵王宮朱甍儼崔嵬雲光發天藻綴戶紛陸離遐瞰極鴻  
濛元和同天倪瓊英灼三秀玉樹交春萐我願酌石髓駕  
言候安期天門正鳴鳳羣羣梧桐萋

送李端甫歸軍懷

典教出中州趨庭憶河縣長波瀉天塹掛席過淮甸游雲  
澹飛雨碧樹鬱蔥蒨豈不煩爾思臨衢極深盼繁華貴知  
止道養沐殊眷日暮念遊方升堂慰情戀論交我無晚結  
芳誠姬髮恨望王屋雲懷人夢甲冑

題蘭石擬古

疇昔登燕臺南望網江介黃雲塞中區秋氣薄恒岱所悲  
霜露迫眷此歲華收落葉日夜飛離禽翩翩邁鬱鬱孰得  
言愁思渺天外

大道日昭昭物情無所遁圓方奠高下布指知尺寸天經  
孰能昧撓我澄源淵心出妖孽生焦勞自成困廓爾保靈  
臺兼山吾止良

勢詐溺流俗翕張相雌雄棧棧荆棘場廣術難我容歟志  
孰藪澤巢林仰高風遺榮保精誠憑化觀始終坤用了不  
秘氣機妙相從守此豈云亢寧悲吾道窮

### 易水渡

朝發良鄉城驅車經易水沙鳴風飛揚日晏雲四起登臨

弔荆卿惻愴悼前軌尙想擊筑情捐軀報知己畏天小事  
大爲國資道揆曷展匹夫雄居焉圖寸匕燕丹事不啻秦  
帝當世恥至今河流聲鳴憤猶未已我行慕英俠悲嘯哭  
山鬼死者不可生嗟哉田光子

涿州

抱介恥僂媚離光滋慨慷叩闕道無由惻惻辭帝鄉寒冬  
百卉腓驅馬踐嚴霜晨過涿鹿城驚飈恍沙場息徒用稅  
駕遐眺臨空荒羣山從西來千里橫青蒼倚劍事悲咤令  
人憶軒皇蚩尤今則亡戰伐何茫茫落日笳鼓發連營旌  
旆揚吾行竟何之流止嗟殊方

懷柔地故宅近廟

落景披層阿崇朝悵行邁停驂得遺廟瞻仰時再拜中堂  
神物憑古壁蟲蘚壞龍衮尙依然英風緬如在因思炎祚  
微四海嘆橫潰斯地產斯人含宏際光大淒其志興復飛  
羽才敵楓天命苟不違曹瞞豈其對我來千載後感激魚  
水會喬林動靈飈陰洞秘元恠尙想樓桑存童童狀車蓋  
時危兵革浩往蹇昧前戒英傑孰可期陳詞致深酌

### 真定城

客行抵燕南獨夜車軋軋斜月耿流光繁星動天未透迤  
出深壁彷彿見城闕擊柝接耳聞哀絃向晨發維時重圍  
解二鎮兵禍結吞噬徇乃私邊隅忍流血防虞此何謂國  
恥殊未雪感此意惻然悲歌激林樾



泚沱河

夙駕違鎮都客行有前期蓬飛歲將晏恨恨臨高岐長河  
動我前來岸流水漸需次向晨渡馬鳴遊子悲天寒野無  
人世便道路疑豈無故鄉懷辛苦曷得辭貧賤本吾分險  
艱庸自持嗟哉雲臺勳千載今得知

邯鄲

訪古慕英俠壯遊過邯鄲連山飛翠來馬首如揚瀚貰酒  
呼美人浩歌弔平原天空響雲濤野闊淩孤翰憶昔致多  
士蛾眉去無難寶瑟燦珠璣簫鼓清夜闌報効豈無人蹇  
翻辭時艱蹇我匪脫穎懷賢邈難扳干戈浩縱橫長路方  
漫漫感激詎有已登車摧肺肝

磁州市

高原黯平無霜重日色死客懷增悲辛行邁日靡靡汾陽  
跨邢衛雞犬接閭里隱賑富人烟漁鹽喜成市岐亭向朝  
泊接浙事薪水黃酒慰我徒停驂縱遐視側聞西州事唇  
齒莫相倚刻戟滿潼關并吞詎能已

鄴下述懷

殘壘宿題雲鴉鳴滿長洲驚風口夕起倒捲漳河流借問  
客遊子蓬飛幾時休沙塵暗長淮風雨迷舊邱獻業不得  
意征車曾少留此邦古名都控帶綿西州井竈列萬家甲  
兵當戎蒐以守足固禦以功代先謀在昔雄武人憑城逞  
英猷蟻封曹瞞塚塵滅高權樓陳迹竟已矣登臨眇予愁

側聞轅門開將令嚴如秋斬牲祀黃帝建旆揮嶺尤三明  
集幕下一羽開遐馭獻諒有冀寢兵可前籌而我尙落  
魄龍鳴動吳鉤功名尙有遂買棹隨輕鷗

清化鎮

驅馬出衛郊羈離嘆流冗窮冬天雨雪所歷涉深恐茲晨  
過名鎮并屋河山拱天外見戍樓雲旗晝飛動江淮事綿  
邈關陝勢奔洶大厦孰得扶持艱百千孔棲幽網龍卧上  
乘驚鶴龍行矣那青萍悲風鼓余勇

福昌寨在宜陽西

峭絕通宜陽中條勢聯絡嶄嚴福昌寨岡阜相倚薄上平  
衍十畝下瞰延清洛喪亂設重關哀笳聞鳴柝我行愧青

歲憑覽感今昨秋色滿南雲寒聲殷寥廓蒼茫嵩嶺思寂  
寞采芝約孰與濟時難含淒嘆淹泊

河南露寶寨近嵩州鳴皋地

搏壁上層峯乘雲躡天關風濤鼓羣有九野何漫漫二氣  
無端倪陰陽自循環河山拱中區萬古情不刊而我一粟  
微覽之意茫然天地則蒼茫風塵靖荆蠻連山黯平衡殺  
氣迴飛翰感往豈不感悲來愴朱顏

白馬峯在河南西

名山奠中區突兀倚天半振衣登雲梯奮志凌汗漫攀蘿  
出絕頂高步跨飛翰元氣晝淋漓曦娥遞昏旦凝然嵩華  
敞遐眺越江漢聯絡走龍蛇南行勢無斷吾思平泉逸況

乃值紛亂黃鵠招不來憑崖發深嘆

宜陽洛南山二十里至楚家莊

洛南多青山走勢連二室幽林石龍嵒谷轉峴鬱我行  
觸奔突登頓迷徑術洹溜發岩光寒陰籠白日况間避地  
人陶復相比密喪亂各因依偷生餘餽飢兵戎幾時已撫  
事傷憊贊山空魍魎號石裂蛇蟒出豈復慰曩懷行行悵  
如失

杞思軒

甫昨失所恃終天抱餘悲羈艱屬行役感物寧不思晨發  
踐嚴霜迢迢陟崔嵬鄉閭眇關河無母吾焉歸憶昔在襁  
褓劬勞念慈闈成人靡由視下土無含悽眷此意難釋兒

生亦何爲聿瞻風木號白日無停枝血淚骨中出夜臺香  
難期側聞著存訓企彼詩中詞名室示旅瑣敢云忘恩慈  
揚顯尙有志懷我重民彝

晚翠堂

歛跡抱幽貞仰喬托高木遙軒挹飛爽壯節時自曠  
龍姿盤踞出空谷落落千丈陰冰霜散繁綠孤雲自棲  
泊野鶴與吟宿不逐桃李顏飄飄古城曲多君守中素砥  
行跨流俗堅白恥磷緇高風企孤竹秋濤響天末華月照  
蘿屋亦欲振余衣相從廝黃獨

落雲軒

華頂拂秋影陽林澹初暉山雲落層軒爽氣吹崑崙默爾

契心賞橫琴當翠微飛蘿結松暝雨色涵清池信美子雲  
宅載謬將問奇

題畫

嘉木結繁蔭山房抱秋陰開門白雲入爽氣吹森沉惆悵  
飛羽夕清歌對孤岑誰歎賦招隱興發邛中琴

江風山月亭

華月上蘿壁江風澹疎櫺金波泛遙渚長夜秋泠泠蕭瑟  
瀛海思悲歌緬雲屏無彈五十絃恐有蛟龍聽

題巢居

介行志邱樊歛華日棲約草堂甫容膝養素契貞樂松雲  
佛聽隔蘿薜結帷幄崖月照鳴琴天風振寥廓因懷大庭

世渾沌時久鑿搆此卽巢枯淳風誰復作從流厭雕鏤恬  
思致元爵惟彼一枝安蕭然甘淡薄

題學圃

大忠爲有身百年總云遊榮辱自外至謫居亦何尤朝旦  
致吾勤山園薙荒幽荷鋤豈不倦生理于茲謀時雨夜來  
過連筒引泉流葵根日已長庶用供晨羞食力詎自苦安  
時固無求申言委天命敢嘆吾行休

賦得浙江送別

大江蟠東區雲塹限吳越連橋互來往利涉由兩浙壯哉  
朝夕勢神恠日際突萬鼓喧海門驚濤捲飛雪緬思鷗夷  
浮沉魄鬱忠烈白馬躍中流時猶見旌節君歸且前渡落



日蘭棹發弔古豈無懷悲歌向山月

黃仲聲小立池上

碧嶂過微雨殘陽在疎林蕭蕭池上風拂彼邱中琴萬物  
妙容與誰歟知我心

醉後同伯聲有賦書竹上

默然契真想悠悠息塵機青山如故人與我中林期歌鼓  
元籟作飄蕭白雲飛蒙莊稱達士千載今何之但得飲中  
趣毋勞嗟夕暉

江西詩徵卷三十九